

13/09/2003

Cukai rokok, produk tembakau naik 20 peratus

CUKAI import dan eksais ke atas rokok dan lain-lain keluaran tembakau dinaikkan 20 peratus dalam usaha kerajaan menggalakkan gaya hidup sihat dan membendung gejala sosial akibat ketagihannya di kalangan rakyat.

Datuk Seri Dr Mahathir Mohamad berkata, kenaikan yang dicadangkan itu masing-masing daripada RM216 kepada RM259 sekilogram dan daripada RM48 kepada RM58 sekilogram, berkuat kuasa mulai 4 petang semalam.

"Peningkatan duti ke atas rokok adalah selaras dengan cadangan Pertubuhan Kesihatan Sedunia (WHO) untuk mengawal penggunaan rokok.

"Bagi membanteras penyeludupan ke atas rokok, kerajaan sedang melaksanakan penggunaan pelekat khas atau banderol serta dakwat keselamatan bagi memastikan rokok yang dijual bukan rokok seludup," katanya.

Membentangkan Bajet 2004 semalam, Perdana Menteri turut mengumumkan pembayaran bonus setengah bulan gaji kepada hampir sejuta kakitangan awam.

Dalam Bajet 2003 yang dibentangkan September tahun lalu, beliau mengumumkan bonus sebulan gaji atau minimum RM1,200 kepada kakitangan awam.

Kakitangan kerajaan juga menikmati bonus setengah bulan gaji apabila Dr Mahathir membentangkan Pakej Strategi Baru bernilai RM7.3 bilion pada 21 Mei.

Pakej itu diperkenalkan bagi membantu negara menghadapi ketidaktentuan global dan membantu beberapa sektor yang terjejas berikutan wabak SARS dan peperangan di Iraq.

Dr Mahathir berkata, kerajaan juga amat prihatin dengan kakitangan yang tidak dapat menikmati pencen sekiranya mereka meninggal dunia sebelum bersara tanpa pewaris.

Untuk itu, kerajaan akan memanjangkan faedah pencen terbitan, selain daripada gratuiti kepada ibu atau bapa mereka.